

新續渭南縣志

一
函
十
冊
玉

新續渭南縣志卷十中

藝文志

新續

元

崇靈觀碑記

王博文

至元己巳之春宣撫趙公介黃冠師朱德明子玉孟志貞子正來相見曰二子素聞吾友嘗從事於文字間故來叅訪且出其志貞之狀曰渭南縣治之南一舍而近有觀曰崇靈乃晉將周處子隱之祠元康中氐人齊萬年反命處征之力戰而歿秦人思而祠之金大定間賜額曰崇靈左

掖太華右抱驪山南揖靈臺北瞰渭水雲山之秀拔樹林之蔽虧風土高爽原隰饒沃麻麥錯布桑棗交映實人間之奧區關中之佳境也至觀道士去來無定不可枚舉至元甲子縣民孫貴梁進等禮請子玉主持之子玉穎川人幼值壬辰兵革之際流寓陝右九歲禮丹陽子馬尊師之孫太華李通源爲全真師院門旣大敬奉之家眾喪葬所須必齋錄之薦命子玉學之子玉性聰穎不葺歲曲盡其能且倜儻灑落喜接賓客人有過門酒食芻粟必令豐厚家之有無不計也善於應物人有所託極力營爲己之利害弗顧也閒從士大夫游酒酣耳熱談笑起舞忘形忘世

人之毀譽弗問也平生慕子隱之風義故居其祠志貞所述如此宣撫公曰子玉之意欲以已之出處與其觀之梗概勤之貞砥願屬筆於子幸無辭焉予曰子玉之爲人已詳見於志貞之狀茲不再陳所謂慕子隱之風義故居其祠者請擴而論之夫人之稟性所尙不同同則相親異則相疏無古今之殊也同則移千載爲一朝不同則睽一朝爲千載今關中士民浩浩子玉與之禮貌非不相際也言語非不相接也而不與之如膠漆之永固金石之不變子隱之歿下竟於今數千百年矣而乃爲之朝瞻對而夕揖拜不啻若父兄之尊師範之嚴何耶志同氣合忠烈果毅

有以感發而然非矯揉勉強而爲之者正孟子所謂一鄉
一國天下之善士斯友一鄉一國天下之善士爲未足而
又尙論古之人也觀子玉志尙如此則其爲可知矣或者
曰學道之人唯當飲澗水衣蓬髮垢首木石之與居鹿豕
之與遊一塵不挂於心一事不勞於想世身兩忘順以待
盡豈可希慕古人交引外物以求聲譽其於爲己之學不
亦遠乎予曰不然夫知道之人以天地爲聚落以古今爲
朝昏其視一身也若太倉之稊米然而好善惡惡是是非
非之心實秉彝固有之良能有不可斯須而泯者大方之
家實不憤憤齟齬而已也若子玉者誠所謂擴達通方之

士與若夫興造之規制道侶之姓名傳授之派別固畧而
不贅也

明

應州儒學明倫堂上梁文

應州
守 薛敬之
邑人

伏以道啟中天幸際堯舜之主文行上世宛然河海之紹
肇自軒黃鴻開湯武周情孔思都爲道德之歸伋授軻傳
尋作天人之趣于以匡君毗國則有要而有倫于以措庶
安民皆是圖而是究奈何雄爭于春秋之族姓火煨于嬴
政之獨夫繼而霸漢夷唐六經寥寥之靡振佛胡酒晉一
心窈窈之罔聞治斯世而杜斯術眎大地而固大晦起鄒

魯百載絕傳之嘆興道學萬年狂瀾之嗟天運循環元氣
自復九江敦頤中洛正叔崛起喬峰吾道底柱疏唐虞而
鑿商周剔清虛而謫邪說三國與五代俱死一心同兩儀
咸澄斯文以時道脉涵治脉之精勵生靈有幸人力荷帝
力之曲成調元皆懷金紆紫之儔人贊化悉把袂曳履之
秀客位天育物之學鑰可啟而關可抽格物致知之功堂
可升而室可入歷宋有數抵元無阿洪惟我朝聖祖神
宗重揭大明之日月經生學士再承萬古之風雲尊孔學
而抑僭議之非祖堯中而斧畔疑之舛爰立師儒之宿增
廣弟子之員自王宮而暨府路逮州郡而及縣封廟貌聖

賢肅望朔之儀禮春秋禘享報今古之宏規乃者應州古
冀重地風俗樸寔人才後先茹越山高嵐光屬爨桑乾河
秀烟靄浮金翠氣灝礪而最清大化繁劇而竟媚明倫堂
之建于元季生員舍之剏于明初毀雨剝風不戢殘乎
寒暑鹹融鹵斥豈容駕乎春秋予忝膺上甄拔守茲厥
土無能提調而忍無廢墜之咨乏力獎裁而敢無興復之
志遂鳩工僦眾琢甍掄材三尺崇基計高五架之突兀諸
生備列席開百葉之差池乃卜乃營肯堂肯構五星天上
今旣聚于奎方萬世坤輿須代歌于梓匠曰上梁東邊
耀突兀幾喬峰撐着太陽不肯曛金城覆照棟梁翁西

桑乾瀲灩波流斯東海不拘潮與汐年年春浪有龍兒
南秀野烟村百里寒竟有山峯屏拱翠不防苜蓿照闌干
北招提木塔勢崔嵬泮宮祇有擎天手常幹東君典世
澤 上碧天星斗遙萬丈他年丹陛對三千禮樂煥然成
一樣 下河圖洛書敷至化當今 聖主重斯文莫學玉

櫃須待價伏願上梁之後景運常新曰父子曰君臣咸茲
焉而討論曰長幼曰夫婦曰朋友俱由此而繹窮螢火雞
窗弟子盡抱彤庭之雨露青瑣絳帳師道常廓上古之文
章俾道學常明而棟梁聯蘇湖之咏使仕籍靡墜而棖桷
發廊廟之吟桂花不蟾秋香滿地昆山不玉砌連門家

禮樂而人詩書樵臯夔而漁稷契儒風盪世文運聿彰

思菴薛先生入陝西會城鄉賢祠記

光祿卿

馬理

三原人

皇明理學名臣推薛文清公爲元

時陝西河州則有

休菴王先生三原則有端毅王先生蘭州則有容思段先

生秦州則有小泉周先生西安則有武城令姚先生介菴

李先生渭南則有思菴薛先生雖名位政行不同其揆一

也思菴先生卽龍門薛氏裔元末兄弟九人避兵渭南下

邽楊化村先生生焉後贈君徙渭南城中先生生有異狀

周歲匍匐畫地成字腹有七赤痣左膊有一黑文入膚五

歲卽嗜書十一屬文賦詩隨君定州幕任見聖賢深衣幅

巾圖像卽求製如法服之家人笑使易之堅不易也景泰
七年年十六歸應鄉試入學宮動必由禮言稱先明學中
師生駭異屢笑之先生不爲動色久之諸人見之卽爲歛
容及九試不第遂棄舉業之習務正學焉書誠明二字于
坐隅曰不如是則虛此生矣旣而益靜學靈台中從遊
者衆蘭有鄭處善者聞風而來爲語周小泉先生學曰斯
文正派在是先生聞而悅之卽裹糧而往師事兩月而返
自是以道自任門人請益爲著定心定性二書又著心說
性說道學纂統洙泗言學錄諸書以示之恒曰學必希聖
猶食者求飽行者赴家食而不飽則餒以死行不赴家則

老無歸宿所矣弟子聽其言教本於踐履皆敬信悅服久之雖遐方異域皆知尊禮稱薛夫子天順初邑人忠國石公得君甚專其門如市先生雖招之不往成化二年貢入太學太學生接其年貌謂關中橫渠復出任丘屈伸輩就講太極聞所未聞就者益眾遂名動京師大學士晦菴劉公雅以道鳴亦屢顧而講說兵部尙書王公請教子不赴王公益器重之俾順天選入鄉試復不第歸依親先時過陝州遇陳雲達先生定交爲友講學陳先生亦篤信好學守死善道人也至是詣靈臺山與麗澤者一年後先生二親相繼歿先生喪葬以禮鄉人法焉時冬月扶柩跣行冰

嘉新江府志卷之四
雪道中亦不知寒母嗜韭每食致之母歿終身不忍食韭
二十一年就選太宰尹公

銓列部元授知應州至卽

課民播種麥禾桑麻春秋省耕歛蚕績時補助焉婚喪有
未舉者助使以時舉之又買牝牡畜令窮獨蕃育之以養
故積粟四萬餘石蓄野蔬尤多歲凶邊民多餓死應有備
無殍逃亡而復者三百餘家皆葺其廬而授之食諸屬邑
流亡者皆歸焉又立義塚收葬死于道路者應故多盜處
以息盜之法由是境內道有遺物亦不拾也尤以興學爲
首務時蒞學導之方而示之的課其業而省其私時以燭
油紙筆給之又從而振德之以故應之士風民俗爲之不

變渾源舉人郭璽信卿長安解元吉人惟正皆來學璽信
道尤篤有傳必拜而受之後以進士爲中書退數學于長
安出其門者多名卿云應山有虎噬人先生祭山以文旬
日虎死于壑蕭家寨北水湧出田中橫流將溺人先生祭
以文水忽雷鳴下洩人免溺焉城中妖狐害人先生祝于
神狐死城中井水色黃味鹹忽一日色白而味甘嘗于州
四隅築黃花營四堡以防虜患後虜屢深入殘傷郡邑應
獨無患指揮橫逆殺人官不能制先生正其罪由是德宣
而威著甯伯王公爲大將先以禮拜凡先生公出令將士
數百戎服衛之撫臣左公鉦葉公祺許公進侯公恂疊以

卓異才政薦之三年考績冢宰王端毅公堂見勞已延之
後堂與坐論道講學移時考功郎中王公以友道接之乃
嗣虎谷公時爲禮部主事志在正學數就講焉考績畢端
毅公留纂修 獻廟寔錄閣臣固不便還應明年獲 恩

封定州公如其官母王氏封太宜人配王氏封宜人九年
陞金華府同知應民遮道挽留號泣而別乃立生祠祀焉
至浙卽建何王金許四公祠屢發明其學以誨後學復表
巖子陵客星釣台大書其石東南學者陳聰輩皆振衣趨
門下受學二年致仕歸正德改元進階朝列大夫虎谷時
督學關中贈以詩手書諸屏曰人人有意欲行私綱紀何

人一振之世上豈無鄒孟氏欲平天下舍其誰先生年七十餘好學如初學者至諄諄以道誨之春秋勝日則吟風弄月于山水間或以事遊會城觀者見其古貌古服乘輿而來以爲孔子周流氣象時呂宗伯仲木呂巡撫道夫方學于正學書院共出郊迎拜于所館以師禮事焉理先聞先生于端毅公後又聞二呂子言宏治乙酉歸自京師過渭南就問禮焉遇諸門未通刺先生卽知爲理以所嘗行禮告之先生所著有田疇集歸來稿爾雅便音思菴野錄及禮記通考嘗曰禮記繁蕪雜亂須辨注之以傳可也乃參互考證者十年凡三易稿成書至于易簣猶刪正今藏

家笥未刊行也先生善小楷行草尤工大書有龍跳虎臥之狀正德丁丑撫按及督學大夫受本縣呈表結狀謂先生立身明道著書垂訓師表後學令有司作主祀于會城文廟鄉賢祠及渭南鄉賢祠中理乃述所聞爲記

思菴薛先生入渭南鄉賢祠記

主事 張治道

長安人

治道少時聞中書吉先生言渭南有薛夫子先生者續道學之源繼程張之後予師之治道仰其名未親炙其門爲恨也正德癸酉與其孫祖學同舉于鄉旣又同舉進士並遊都下得觀野錄諸書始知先生之道師友淵源有自弘深廣博王大精純躬行實踐果信程張之後一人而已益